

ESANAK

RAFA LARREINA

(Eako Antolakuntza idazkaria)

«Eusko Alkartasunak bere proiektu politikoa eta ordezkaritza defendatzeko betebeharra dauka»

BEGOÑA ERRAZTI

(Eako presidentea)

«EAJren baldintzekin, EAri ukatu egiten zaio ordezkaritza»

JUAN MARI JUARISTI

(EAJko legebiltzarkidea)

«Eak dioenaren kontrakoa gertatu denez, EA zerbait ezkututzen ari da»

gobernatzeko parada lukeela azaldu zuen EAJko parlamentariak. «Eak galeraz hitz egiten du, baina justu aurkakoa gertatzen denez, zenbait gauza ezkututzen dituela pentsatu behar dugu», kritikatu zuen Juaristik. «Zenbait esaldi biribil ez dira egiaekin uztartzen, eta horrelako gauzak entzuteak harritzen gaitu», gaineratu zuen.

«Zubigintzarako aukerarik ez»

Horrenbestez, bi alderdien arteko balizko akordioaren haustura behin betikoa da. «Zoritxarrez, zubigintzarako aukera txikiena dagoenik ere ez dut uste», azaldu zuen Juaristik. «Guk koalizioaren beharra berretsi arren, beste aldetik izugarritzko aldaketa egon ezean, ez dut uste akordioa lortzeko aukerarik dagoenik», gaineratu zuen.

EAJko zuzendaritzako idazkari Josune Ariztondok ere negoziazioak berreskuratzeko aukera baztertu zuen: «Ez ditugu elkarriketak berreskuratuko, behin betikoa den bakarra heriotza da»

Bestalde, Larreinak esan zuen Eak atzo bertan ekingo ziola bere zerrendetarako hautagaiak proposatzeari. Gainera, datozen hauteskundeetan duela bi urte egindakoetan baino ordezkaritza handiagoa lortuko dutela azpimarratu zuen. «Hauteskunde hauek indarrez eta lasaitasunez hartuko ditugu», azaldu zuen.

Orain Aralarrekin negoziatioak hastea ez dute baztertu Eako buruzagiek. Begoña Erraztik atzo esan zuenez, EA prest legoke Aralarrekin koalizio posible bati buruz hizketan hasteko, Aralarrek horretarako borondatea balu. Aralarrek, hain zuzen, biharko batzarrean aztertuko du hauteskundeetarako zer estrategia hartu.

EAJ-KO ETA EA-KO ORDEZKARIEN BALORAZIOA

EAJk eta Eak hauteskunde koaliziorako negoziatioak hautsi dituztelarik, EGUNKARIAK bi alderdiotako hainbat ordezkariaren iritzia bildu ditu, nork bere balorazioa egin dezan.

Penatuta, baina berenari eutsiz

MARKEL OLANO (EAJren EBBko kidea)

«Ahalegin serioa izan da, eta tamalgarria da koalizioa lortu ez izana»



«Koalizioa egiteko ahalegin serio bat izan da. Gure alderdiaren partetik behintzat, ahalegin osoa egin dugu akordio

batera iristeko. Azkenean debora gainera etorri zaigu, baina ez da izan gure arazoa; uste dut hor beste kontu batzuk ibili direla tartean. Nire aldetik, ikusi dut gure alderdiak malgutasuna erakutsi duela negoziatioetan; eta Eak ere bere ahaleginak egingo zituen. Ahalegin serioa izan dela garbi daukat. Ez dakit ate guztiak itxita dauden, baina tamalgarria da akordio batera iritsi ez izana. Alderdi moduan, EAJk sendotasuna erakutsi du hauteskunde ikuspegi batetik begiratu, bereziki maiatzaren 13an. Arazoa ez da sendago edo ahulago izan; gure alderdiak erakutsi du, hauteskunde ikuspegi hutsetik, daukagun gaitasuna herri honekin konektatzeko. Baina hauteskunde hauek ez dira hauteskunde soilak. Badaude beste elementu batzuk, batik bat Ibarretxeren ekimena, eta guk ikusten dugu datorren urtea politikoki oso garrantzitsua izango dela. Garrantzia hori neurtuko da lehendakariaren ekimena aurrera eramateko lan horretan. Lehentasun politiko nabarmena izango da lehendakariaren ekimena bultzatzea, gure herri honetan aspaldiko partez mahai gainean jarri den proposamenik inportanteena delako. Testuinguru horretan, hauteskundeek ere bere eragina izango dute».

IÑAKI GERENABARRENA (EAJko ABBko presidentea)

«Nahiz eta zerrenda bereizietan joan, EA ez da gure etsaia»



«Akordio eza ez dut ongi ikusten, jakina. Guretzat eta Euskal Herriarentzat elkarrekin joatea garrantzi handikoa zen, pasa den hauteskundeetan ikusi baikenuen koalizioak ilusio handia sortu zuela herritarren artean. Gainera, jendeak ez du ulertuko zer dela eta ez dugun akordiorik erdietsi. Bestalde, nik ez dakit zergatik ez garen akordio batera heldu, EAJk egin duen proposamena nahikoa irekia izan baita, baita EArentzat ere. Baina ez dakit zergatik ez duen funtzionatu. Orain, hauteskundeak begira, bakoitzak bere bidetik jo beharko du. Gu geure hautagaiak prestatzen hasiko gara eta, hauteskundeetara bakarrik joan behar izanez gero, hala joango gara. Hala ere, gauza bat jakin badakigu, alegia, une eta egoera honetan, gure etsaia ez dela Eusko Alkartasuna; hori argi eta garbi daukagu. Guk badakigu memento honetan Eusko Jaurlaritzan eta beste hainbat erakundetan elkarrekin gaudela. Horregatik, nahiz eta zerrenda desberdinetan joan, argi dugu gure etsaia ez dela EA».

ANDRES ALCALDE OLANO (Eako alkatea Okondon)

«Akordioa lortu ez izanari bidezko deritzot; EAri ezin zaio eskatu zerua, lurra eta itsasoa»

«Nik bidezko deritzot koalizio akordioa lortu ez izanari, ezin baitzaigu zerua, lurra eta itsasoa eskatu. Negoziatioetan Eusko Alkartasunak defendatutako jarrera egokia izan dela uste dut nik, eta ez ditut ongi ikusten EAJk akordioa lortzeko jarritako baldintzak. EAJ ez da batere malgua izan EArikiko negoziatioetan. Are gehiago, ez dut uste akordiorik lortzeko inolako interesik izan duenik. Aitzitik, Araba, Bizkaia eta Gipuzkoako Batzar Nagusietan koalizioa lortu behar zela iritzidiot, eta agian hor banatuta joateak kalte egingo digu. Datozen hauteskundeak dagokienez, ni Okondon ez naiz sekula EAJren batera koalizioan aurkeztu, eta inoiz ez dut haiekin koalizioa egiteko asmorik izan. Urte asko daramatzat nik Okondoko alkate izaten, eta ez dut inoiz EAJren laguntzarik behar izan udal hauteskundeetan; gehien-go absolutua lortu izan baitut beti. Ez dakit beste udalerrietan eta erakundeetan zein egoera egongo den, eta koalizioa ez lortzeak zer eragin izan dezakeen; baina, nire kasuan, EAJ ez da batere beharrezkoa izango datozen hauteskundeetan».

JOSE MARIA AIERDI (Eako alkatea Lekunberrin eta legebiltzarkidea)

«Gure botoemaileak akordioaren zain daude»



«Oraindik ere koalizioa lortzeko elkarriketa bideratu daitekeela uste dut. Bi alderdiok, eseri eta zailtasunak

moldatzen eta gainditzen saiatu behar dugu. Gure botoemaileak gure arteko akordioaren zain daude. Eta, are gehiago, EAEko azken hauteskundeetan lortu ziren emaitzen ondotik. Euskal Herriko gizarte askotarikoa gidatzeko gai izan behar dugu. Horrek bi alderdietako jarretan malgutasuna eskatzen du, eta batasuna lortzeko ahaleginak egiten segitu behar dugu. Nafarroari dagokionez, UPN-PPk euskal nazionalismoari neuririk gabe eta gogor erasotzen dio. Garaia da horri beste modu batean aurre egiteko. Beste Gobernu bat posible dela esateak exijitzen du gu gai izatea gauzak aldatzeko. Gai izan behar dugu beste Nafarroa batuago bat lortzeko, hori delako gizarteak eskatzen duena. Gure familia politikoetan akordioak lortzeko gai ez bagara, gizarteak akordioak erdiesteko gai ez garela ikusiko du. Gizarteak ez du hori ulertuko, eta bereziki Nafarroan. EA eta EAJren arteko elkar ulertzea handitu egin behar litzateke hemen».

JOSE LUIS ETXEGARAI (EAJko alkatea Lesakan)

«Pena handia da, eta botoemailearen ilusioa galduko dugu horrela»



«Lastima handia da hobeto ez moldatzea eta koalizioa lortzeko negoziatioak eten izana. Oraindik afera konpon-tzen ahal da. Zatiketa eta hauteskundeetara berezirik joatea oso txarra da Euskal Herriarentzako. EAJ eta EA ez konpon-tzea oso txarra da. Horrek erakusten du ez dugula maila ona ematen, eta botoemaileak ilusioa galduko du horrela. Jendearen ilusioa ez galtzeko, akordio batetara iristeko gai garela frogatu behar dugu, eta akordioa lortu».

MANEX PAGOLA (Ipar Euskal Herriko Eako bozeramailea)

«EAJren inposaketagatik hautsi dira elkarriketak»



«Ipar Euskal Herriatik ikusita, erran neza ke elkarriketak EAJren inposaketagatik hautsi direla, bi alderdien arteko

harremanetan hainbat eta hainbat aldiz bizi eta ezagutu izan dugun bezala. Egin dituen proposamenekin, Eak argi eta garbi frogatu du solaserako gutizia daukala, eta horren adibide nabarmenak dira proposamenetan egin eta onartutako aldaketa guztiak. Guk, alderdi gisa, Euskal Herriaren iritzia bermatu eta aitzina eramanen duen bidean segituko dugu, eta hori ez dugu aldatuko. Elkarriketei begira, 1999ko hauteskundeetako emaitzak dira gutieneko irizpide gisa onartu behar den oinarria. Alabaina, EAJk ez du hori nahi. Zergatik? Berek erantzun beharko dute. Abertzale demokratiko oro bilduko lukeen egitura osatzearen alde gara, baina, horrela ez bada, funtsean herriak deliberatu beharko du, proiektuen arabera, zeinek duen arrazoiak».

BEÑAT OTEIZA (Ipar Euskal Herriko EAJko koordinatzailea)

«Hautesleek ez dute deus ulertuko elkarrekin aurkeztzen ez bagara»



«Abertzale izan ala ez, guziendako argi dago EAJ eta EA biziki hurbil direla sentsibiltate mailan.

Hautesleek ez dute deus ulertuko hauteskundeetara elkarrekin aurkeztzen ez bagara. Abertzale guziek espero dute azkenean koalizioa osatzea. Koalizioa osatzeko negoziaketak hautsi dira, baina ez deuseztatu. Ezin da oraindik akordioa baztertu, eta espero dugu akordioaren mentura izan dela. Dena dela, Hegoaldeko gatazka horiek ez dute eragirik Ipar Euskal Herrian. Hemen orain artean bezala segituko dugu. Abertzale demokratikoen interesak bermatu behar ditugu eta hemen elkarrekin ez bagina aurkeztuko orduan bai nehork ez lukeela ulertuko».